

Pfannehouer 2003

Hurralinghi

Bim Bärner Schtaatsakt isch efange
Cheibemässig d Show abgange
Während mir ir Altschtadt chli hei gliiret
Hei si 650 Jahr Fasnacht gfiiret

Dr Imitsch-Gwinn mit dr Alinghi
Schetze n'ig für d UBS als gring ii
S isch wi ar Börse, aus bim Aute
Supergeil mit länge Flaute

Postalinghi

Die Sondermargge isch enorm !
Si zeigt dr Wäg für d Poschtreform
Ganz vor' wird d A-Poscht präsentiert
U hinge n'all's, wo nid ränziert

Bir Poscht da fragsch di, was das sigi
Es isch nid gaga, es isch Gygi

Globalinghi

Am WEF hei si dereguliert
Bärn hett am schnällschte reagiert
Und am gliiche Tag e Massnahm troffe:
D Gschäft hei di ganzi Nacht düür offe

Die Selling-Action isch famos
Chlau das Züüg - auf und Davos !

Gouvernementalinghi

Was die im Bundeshuus vo Demos halte
Gsehsch da drann, wi si dr Platz wei gschtalte
Bi däne bissisch uf Granit
U d Wasserwärfer si nid witt

U we de alles nüt meh nützt, weiss dr Tschäppät, wie me schprützt

Kuhstalinghi

Swiss Dairy Food is now K.O.
No turnaround, sais CEO
No milk, no knowhow, I'm afraid:
dr Toni ish uf d Shnorre gheit !

BergundTalinghi

d FDP tuet sech verränke / und wott itz antizyklisch danke
Wüll si churz und flach isch usecho
Hett si itz d Langen-Berger gnoh

öb irgendeine, irgendeini
Isch bir FDP doch Hans was Heini

Kapitalinghi

Vor Novartis dr Vasella
tuet vor Pensionierigs-Angscht verzella:
Was söll er ässe, wo ga wohne
Mit no höchstens zwöi bis drei Millione ?

Ds Kapital wird chrank und chränker
Drumm bring Di Schtutz am Schnitzel-Bänker

Prozentualinghi

Bim Alk am Schtüür hei si's kapiert
Dr Zivildienst wird n i d reduziert
Gäb si dr zwöit Entscheid hei troffe
Hei si zum erschte sech no Troscht aagsoffe

Skandalinghi

Wär hett im Bärner Bahnhof o
All di schöne Bänk wäggnoh ?
I gloub', 's si die vor Swissair-Spitze
Die wette lieber nid ga sitze

Nationalinghi

Mir schpare, schpare, s'isch erfröili
Das fröit ou ds Bundes-Ka-sparsöili
Und als zwöiti Gotthard-Röhre
Gnüegt am Blocher sini Schnöre

Animalinghi

We D' schtirbsch, de chunnsch bir Schtadt a d Kasse
Ou als Läbige vo jeder Rasse
Als Hund wirsch büesst für chlini Sache
Nume dr Fuchs darf gäng no ungschraft mache

Fussbalinghi

Alarm und alli Maa i ds Boot !
Iisatzwäge Schtuefe rot !
Alls in Bereitschaft, hopp dr Bäse
Bi YB tüe si Akte läse

Kolossalinghi

Twentysix plus twentysix
D Swiss hett en ambitiöse Mix
Zwänzg Chläpf si uf dr Schtrecki blibe
Als nächschts chunnt itz de 5 statt 7

Minimalinghi:

Am Chef si Plan laht alles off: IL FAUT DOSE(R) LA CATASTROPHE !

Fatalinghi

Scho wider zwo Pensionekasse
Mit Loch i dr Millionemasse
Wenn's konsequänt wottsch witterführe
Chasch gli mal d Kasse pensioniere

Fiskalinghi

Ou ig ha vo mim Schtürbüro
Sone zwöiti Rächnig übercho
I ha se furtgheit, das geit rund
Itz bini gschpannt, wenn ächt di erschti chunnt

Pisalinghi

Das Pisa ischt scho chlei ein Seich
Weder eben: Mir ischts gleich
Die andern können jeden Quark
Drfür sind mier im Segeln shtark

Babalinghi

Nüün Bundesrät, das wär es Zeiche
De chönntsch bim Cheigle n'öppis preiche
Bi vierzäh Bundesrät hingäge
Wäre fuf gäng blöd desumegläge

D Bänk für ds Söili

vom Pfannehouer 2003

Kollateral

I ha mis Söili hür deheime glah
Si mög' eifach nid cho d Sou ablah
öb sie's de wider mal würd wage
Müess me z Washington u z Bagdad frage

Drum chunnt dä Teil vo mine Bänk
Ungschminkt, schtill, mit weni Ränk

General

Warum wott ächt d Frou Calmy-Rey
Unbedingt dä Powell gseh ?
Mi tünkts je lenger deschto meh
Dä gsächli nüüt und niemer meh

Senegal

Ja, Frou Metzler, das mit Senegal
Isch äbe chli ne heikle Fall
Ou nach Alinghi gitts halt Sache
Wo me nid so cha vom Schiff us mache

Wasserfal

I bi am Tag vom WEF dür d Schtadt us gloffe
Und ha dr Wasserfallen troffe
Das heisst, är hett mi gar nid gseh
Wüll mit Schrot u Gas gsehsch niemer meh

Ds WEF cha guet für Aaschtand wärbe
Was die verbräche, gitt ke Schärbe

Uf George W. Wasserfallens Lischte
Hetts 50 Millione Terrorischte
I blibe troztdäm Optimischt
Oder mira Hoffnigs-Terrorischt

XXXXXXXXXXXXXXXXXXXXXXXXXXXXXXXXXXXX

Banalinghi

I muess i d Sitzig vom Verwaltungsrat
Dört ligt viil Bonus-Gäld parat
När schlöinigscht witter mit em Chare
Für z Bärn im Grossrat hälfe z schpare

Im Kanton Bärn heisst Schpare SARE
Drfür mälcht me när di ermschte Narre
Di drei höchschte Bärner si fürwahr
KaSPAR, MÄLCHior, BalthaSAR

Optionalinghi

Ig schänke n'öich dä Schnitzelbank
D'Melodie chunnt schlicht und schlank
Dihr tüet ne sälber undermale
- u de müesse mir kei SUIZA zahle !